

佛說四未曾有法經

西晉二藏法師竺法護譯

聞如是一時婆伽婆在舍衛城祇樹給孤獨園爾時世尊告諸比丘轉輪聖王有此四未曾有法云何爲四於是轉輪聖王爲人民類皆悉愛念未曾傷害譬如父子轉輪聖王亦復如是愛敬人民未曾有瞋怒向之譬如父有一子是謂轉輪聖王初未曾有法或復轉輪聖王遊人民間見皆歡喜如子親父是謂轉輪聖王二未曾有法復次轉輪聖王住不遊行時人民類其有覩者皆得歡喜彼轉輪聖王與人民說法其有聞者皆悉歡喜時人民聞轉輪聖王說法無有厭足是謂轉輪聖王三未曾有法復次轉輪聖王坐不遊行時人民類其有覩者皆悉歡喜彼轉輪聖王教

勅人民此事可爲此不可爲此可親此不可親若爲此事者長夜獲福無窮極若爲此事長夜受苦亦無休息彼人民類聞轉輪聖王如此教勅喜無厭足是謂轉輪聖王有此未曾有法如是阿難比丘亦有四未曾有法云何爲四於是阿難比丘若至比丘衆中諸比丘見皆悉歡喜彼阿難比丘爲說法其聞法者皆悉歡喜諸比丘聞阿難所說無厭足是謂阿難比丘第一未曾有法若阿難比丘默然至比丘尼衆中其有見者皆悉歡喜彼阿難比丘爲說法其聞法者皆得歡喜時比丘尼衆聞阿難說法不知厭足是謂阿難比丘第二未曾有法若復阿難默然至優婆塞衆時優婆塞見皆歡喜彼阿難比丘爲說法時優婆塞衆聞阿難所說無有厭足是謂阿難

比丘第三未曾有法復次阿難比丘默然至
優婆夷衆中彼衆見者皆悉歡喜彼阿難比
丘爲說法優婆夷聞者無有厭足是謂阿難
比丘四未曾有法爾時諸比丘聞佛說歡喜
奉行

卷九

十四

佛說四未曾有法經